

談

經



談經卷之四

京山郝敬學 男洪範輯

門人田必成彭大翮校

春秋 凡五十六條

春秋一書千古不決之疑案也。非春秋可疑，世儒疑之也。仲尼原筆之舊史，不傳矣。左氏遮拾遺文，闕畧未備，可据纔半耳。其於聖人，不言之情，茫乎昧乎。公穀襲左而加例，胡氏襲三傳而加鑿，吁嗟春秋幾同覆射矣。



春秋魯史之提綱也。仲尼憂五霸，借魯史標義。其所難言，與欲言之情，仍具舊史。舊史亡，後儒揣摩，而聖意遂晦。左氏猶及見舊史，薈叢其事，而不達其義，開附會之端。公穀因左爲短長，而後儒益加穿鑿，春秋遂不可讀矣。

六經之文，惟春秋最爲明顯。所書皆五霸諸侯大夫盟會戰伐，開卷知其爲亂蹟，而世儒以爲隱諱之文。何與？子云：巧言令色足恭，匿怨而友其人。左丘明恥之，丘亦恥之。吾之於人，誰毀誰



譽斯民也。三代之所以直道而行。此春秋底本。自後儒以褒貶論。而底本壞。子云。天下有道。禮樂征伐。自天子出。天下無道。禮樂征伐。自諸侯出。天下有道。政不在大夫。天下有道。則庶人不議。此春秋格局。自後儒以字例合。而格局壞。子云。予欲無言。天何言哉。四時行焉。百物生焉。二三子以我爲隱乎。吾無隱乎爾。吾無行而不與二三子者。是丘也。此春秋宗旨。自後儒視爲深文隱語。覺仲尼胸中。直是一片荊棘田地。而宗



旨壞經此三壞春秋於是乎不可讀矣夫春秋無深刻隱語無種種凡例不以文字爲褒貶不以官爵名氏爲貴賤未嘗可五霸未嘗貴盟會未嘗與齊晉未嘗黜秦楚吳越爲夷狄此其犖犖不然之大者今欲讀春秋勿主諸傳先入一字但平心觀理聖人之情自見明白易簡者聖人之情其艱深隱僻皆後儒之臆說也

今之學春秋者皆以經說三傳非以三傳說經也知有三傳不知有經苟無三傳是并無經矣



以三傳重春秋非知春秋者也。舍三傳而知春秋不可一日無者。始爲真知春秋。

春秋三傳首左。昔人謂爲左丘明作。司馬遷杜預首信之。愚按左丘明爲魯史官。夫子旣本其史作春秋。乃丘明又轉爲春秋作傳耶。不知孔子教之作耶。抑丘明自作耶。若孔子自爲含糊不了之語。倩人作傳以明何異於乞鄰而予者。果爾。此傳受旨於仲尼。卽公羊穀梁何緣再作。若丘明以意自作。當時親見夫子。其說亦必不



可易。就使聖意深遠。何至牴牾太甚。今詳傳中斷例敘事。種種迂謬。反有借義於公穀者。豈親見仲尼者乎。先儒謂仲尼素王。丘明素臣。以其經傳相輔也。今有經無傳者半矣。疑者闕而無考。誕者謬而不經。誤者迂而不合。豈其出丘明手。而踈戾若此乎。竊意此傳周秦間人僞撰。不足盡信也。

予云。巧言令色足恭。匿怨而友其人。此五霸之節也。又云。左丘明恥之。丘亦恥之。此因魯史作



春秋也。故謂左丘明爲魯史官。或然。謂左傳卽左丘明所作之魯史。則非也。察其精神。全在藻繪。於聖人作經之意。都未領畧。只如後世新進辭人。借玄晏先生求名耳。公穀輩真以此書出左丘明手。端足起例。至使明白易簡之旨。釀爲爭訟之端。而聖人忠厚之意。反成險刻瑣碎之書。皆由信左過耳。

仲尼筆削之舊史。作自丘明者。不可復見已。古史汗竹記事。文不能多。然定不如經文之簡。經



特標其要領。而巔末具在舊史。原非棄舊史不用也。如棄舊史不用。則經所書者。纔什一。而所遺者什九。令後世何所取裁乎。惟其舊史亡。後人以雕鐫之辭。補綴別籍。參以胸臆。妄起凡例。後世遂誤爲左丘明。一切憑之。憑而不合。牽強附會。聖人之情。遂晦矣。若使舊史在。因目求綱。是非了然。何紛然覆射之有。

左傳如出丘明手。則凡經文所書事。未有不詳。有闕。未有不知者。今經有闕而不知。有事而



無考。豈見而知之者。與其非左丘明作無疑也。愚嘗摘取其誣。別爲非左。以俟後之君子參焉。至於公穀疏罅鹵莽。而公羊尤甚。胡傳爲宋經筵作。亦胡氏之春秋耳。皆未可據也。

左傳或出晉人之手。故其說往往右晉而尊重耳。譽五臣不啻口出。誇晉人功業。無異三王子孫。世受諸侯朝貢。卿大夫招權納賄。貪淫敗禮。皆鋪張其事。恬不以爲怪。世儒遂謂春秋尊晉。舜霸承迷至今。皆左誤之也。



司馬遷序史記述董仲舒之言曰。孔子知言之不用。道之不行也。是非二百四十二年之中。以爲儀表。貶天子。退諸侯。討大夫。以達王事。果若斯春秋者。脩怨雪憤之書耳。此馬遷之私志。而以裁度春秋可乎。大抵六經當漢初。學者未識指歸。馬遷於春秋守左。仲舒守公羊。今左公羊具在於春秋。若何。齊人滅紀。以爲復讐。衛輒拒父。以爲大義。許止弑父。以爲孝子。漢儒說春秋類此矣。遷史一書。紕漏不可枚舉。其議論識趣。



又烏足取衷乎

凡國史以垂戒爲義故孟子曰晉之乘楚之檮杌魯之春秋一也一者義也孔子曰其義丘竊取之竊取垂戒之義也史垂戒而仲尼竊取之何也史多僞飾是非不明聖人核其實以明是非之蹟奇憂世之情故曰竊取非謙讓也

春秋無例但據史所記之事有慨於心者提而書之公道難揜是非自見時或創設新義如正月稱王王稱天鄭棄其師天王狩于河陽之類



與凡或書或不書隨宜化裁非爲例也其餘多  
因舊史襲括成文而世儒謬起凡例如云桓無  
王定無日秦楚吳越夷狄無君臣無大夫夷狄  
不月卑國不日君弑賊不討不書葬外事不告  
不書凡書敗詐同盟書名譏世卿譏逐事伯討  
責備賢者書爵書名書氏諸如此類不可  
枚舉皆後人強設非仲尼有明訓也及其比擬  
不合則又曰美惡不嫌同辭又曰有變例有特  
筆然則仲尼乃滑稽之雄而春秋爲譁張幻語



豈聖人作經之義夫古今雖隔聖凡同心善者必可喜惡者必可惡讀其事而人有喜心卽仲尼亦喜之可知讀其事而人有惡心卽仲尼亦惡之可知不必問例也

春秋不爲一家作故自大夫以下事不書春秋不爲忠臣孝子作故賢人君子事不書春秋不爲聖帝明王作故善政顯績不書凡獎藉誇詡之辭勲庸寵利之事皆非春秋之義世儒未達○春秋之義在不言直其事而是非自見時或



辭有抑揚而聖言溫厚精約微顯各中天則雖  
意旨不露而無深刻隱語但平心細玩蒼素自  
見若謂字褒字貶以行賞罰此俗儒之妄說仲  
尼斷斷無是也

孟子曰春秋天子之事謂春秋所記禮樂征伐  
自諸侯出皆僭天子之事者也故曰天子討而  
不伐諸侯伐而不討五霸摟諸侯以伐諸侯三  
王之罪人所以春秋爲天子之事而作也豈謂  
仲尼以天子之事而自用乎哉後儒緣飾仲尼



以爲素王。誣謂命德討罪。以匹夫竊二百四十  
二年南面之權。所謂癡人前不得說夢也。

子曰。能以禮讓爲國乎。何有。不能以禮讓爲國。  
如禮何。故子路一言過任。夫子哂之。況以匹夫  
行天子之事。褒貶當世公侯卿大夫。而曰吾以  
撥亂反正。是何異披蓑而救火。竊簡牘而寫法  
律也。筆札空言妄稱命討。此後世磔胤詭徇戲  
謔之文。豈聖人經世之典與。

讀春秋而後知聖人之不得已也。亂臣賊子。滔



天之惡必致慎致詳惟明惟允然後直之稍涉微曖則委蛇含容寧從其疑至如諸傳所記貪淫奢僭非禮猥瑣之事一切不書誠不欲盡言毛舉使世道民風多受垢累也但舉征伐盟會弑逆僭竊之蹟以寄其憂亂之情然辭旨平易不露圭角愚每伏而讀之至於廢卷流涕而歎聖人天地之心博大寬仁之至也其言曰知我罪我其惟春秋嗟乎千載而下其誰知之

仲尼嘗曰惡稱人之惡者惡居下流而訕上者



子貢亦曰惡。訐以爲直者。聖賢用心。仁厚忠敬。如此。春秋之作。豈肯自犯其所惡哉。是以義正而情婉。法直而禮恭。憂深而辭遜。是故魯隱公之死。仲翬弑之也。而書公薨。桓公死于齊。彭生殺之也。書薨于齊。昭公出奔。季孫意如逐之也。書孫于齊。文姜敬嬴。穆姜以淫惡。亦書夫人小君死。亦書薨。季友酖殺其兄叔牙。書公子牙卒。慶父殺子般。書子般卒。齊桓殺哀姜。書夫人薨。以屍歸魯。書喪至自齊。襄仲弑嗣君。書子卒。逐。



君母書夫人姜氏歸于齊季武子弑嗣君書子  
野卒凡此皆魯事之惡曲爲之諱者也至周惠  
王之見逐于五大夫也鄭莊公之射王中肩也  
王子帶召戎伐王火其東門也周大夫王叔伯  
與爭政而晉趙盾聽訟也周殺大夫萇弘以謝  
晉趙鞅也此類皆諱不書晉重耳召襄王于踐  
土亦不書再召至溫乃書狩凡此皆天王之醜  
曲爲之諱者也莒僕弑父不書僕而書莒晉欒  
書中行偃弑君不書偃而書晉鄭子駟弑君髡



頑書卒于郕莒展與弑父密州。不書展與書莒人。楚子圍弑其君麋。齊人弑其君陽生以謝吳。而皆書卒。鄭祭仲衛黔牟。孫林父甯殖。北燕大夫逐君。皆書其君出奔。凡此皆外事之疑而從輕者也。春秋僭國三。魯僭禮。楚僭號。晉僭權。魯用八佾。郊禘大雩大蒐。兩觀世室。皆微舉其事而不直書。楚武王始稱王。晉襄公徵諸侯入朝。晉悼公命諸侯朝貢之數。齊頃公欲王晉。魯鄭之君入晉稽首。皆不書。至于伯子男稱公侯。一



切因之不改此類又何其恕也是以春秋法嚴  
義正而其委蛇忠厚又如此蓋教天下萬世以  
臣子事君父之禮與士君子立言之道所謂脩  
辭之誠出於是非臧否之外者也他如晉趙盾  
鄭歸生許世子未操刃而書弑君晉申生宋痤  
自縊死而書殺子蓋由學者不信經而信傳以  
爲春秋責備之嚴不知聖人推見至隱皆道其  
實也豈有已甚之辭哉而世儒反謂春秋爲刑  
書以至比附吹求不遺餘力果爾則春秋慘礅



刻剥爲韓商之祖矣。豈其然乎。豈其然乎。

孟子曰。王者之迹熄。而詩亡。詩亡。然後春秋作。春秋與詩相爲終始也。詩有美刺。西周之事也。春秋有是非。東周之事也。詩之美刺。其目在序。春秋之是非。其目在史。序存而史則亡矣。史亡而傳畧可知也。序直而詩婉。史詳而春秋約。故詩以無美刺爲美刺。春秋以無是非爲是非。可與言詩。斯可與言春秋矣。未知詩。烏知春秋乎。

○孟子曰。世衰道微。邪說暴行。又作。臣弑其君。



者有之子弑其父者有之孔子懼作春秋今讀其書無非弑君賊父叛臣亡子喪師覆國干名犯紀之事與盟會爭戰送死吊災奔走之禮其間偶有所取亦就事差別非喜譚樂道之也若世儒競春秋讚頌五霸而已殆似夫子喜之而作何懼之有

諸傳譚桓文何津津然也二君以篡弑得國卽有震世之功仲尼不齒況生平全倚詐力爲名教之罪人學仲尼者顧亟稱之其大旨已悖矣



他尚何言哉。今檢春秋所書桓文之事。其誰爲仲尼所取者乎。使仲尼而有取于五霸。不言罪我矣。

齊晉與楚爭功。假尊周爲虛名。易曉也。儒者以尊周諛齊晉。而抑楚驅諸侯以事盟主。則是仲尼亦鵲突遷就。教天下假也。開詐力之門。啓奸雄之漸。烏乎可。其謬起于攘夷尊周一語。千載耳食。習而不察。

世儒說春秋。舍尊周攘夷。則茫然無据。故不得



不稱五霸。稱五霸。則不得不獎齊晉。獎齊晉。則不得不驅魯衛諸國事之。事之無名。則不得不以伐楚爲懷夷爲尊周。不得不以會盟爲大事。以諸侯相從爲有禮。以囚執諸侯辱王臣殺行人滅國併地爲伯討。一部春秋。祇爲尊五霸。頌功德而已。嗚呼。聖人之情。悒鬱千載。是誰之咎。○嗟。太王迹熄矣。孔子作春秋。以明王迹。是卽孔子之所以尊周也。若謂孔子不能尊周。必藉詐力之桓文以尊周。謬也。謂桓文尊周。孔子懼。



天下後世不知作春秋以爲表章之尤謬之謬也

昔人云帝降爲王王降爲霸孟氏亦以五霸與三王較故世儒謂五霸未易訾也夫王降爲霸霸假爲王是乃春秋所由作而世儒更以春秋爲獎霸其若之何意謂春秋所不卽爲七王者五霸之力也謂五霸若在周室不滅夫周之東遷無異杞宋矣有桓文不興無桓文不滅何加損也桓文上下五十餘年五霸共二百四十餘



年五霸盡而東周存者。又二百年。此無霸不滅之明效也。七國之縱橫。五霸盟會開之也。七王之兼併五霸滅國導之也。赧王稽首獻地。五霸挾天子侮王室先之也。有五霸自有七王。若春秋獎五霸。則從橫之徒皆行春秋之志者矣。然則春秋不爲蘇秦張儀作俑乎。向使仲尼之志行。春秋之義伸。則當世無五霸。後此安得有七王與嬴秦之禍。而世儒不思也。

諸侯友邦各君列爵雖五。而皆統于王。比肩事



一人無自相臣之禮。王室卑。五霸爭主。諸侯亂也。孔子憂之。作春秋。儒者謂天下無王。姑以諸侯與齊晉使之爲主而不亂。嗚呼。何能一日而不亂也哉。無故而令諸侯俛首朝之。討曰。伯討。盟曰。主盟執其君。殺其臣。滅其國。分其土。使諸侯不敢抗。不然者。仲尼削其爵。書其名。譏之貶之。是春秋爲齊晉資斧。率天下以亂也。誰爲此言。左氏作傳。公穀襲之。司馬遷董仲舒之徒。和之。轉相傳述。至于今二千餘年。牢不可破。春秋



之不明久矣。獨賴有孟氏七篇在耳。

明王在上。天下有道。小國事大國。亦莫不有禮焉。非謂諸侯可無禮於齊晉也。惟是挾詐力。稱霸主。假盟會。連結而攻之。要脅而朝之。則大亂之道矣。仲尼豈教諸侯以此事齊晉乎哉。或曰。古之王者。置方伯統諸侯。是方伯尊於諸侯也。然必有天子而後有方伯。無天子而方伯自行。是自爲天子也。五霸者。皆自爲天子者也。謂方伯得專征伐。亦後儒之臆說。非仲尼有是言也。



仲尼惟曰禮樂征伐自天子出而已矣

仁義可爲而不可襲也唐虞君臣讓而燕會襲之夷齊兄弟讓而吳光襲之伊尹攝政莽操襲之文王爲西伯小白重耳襲之君子高唐虞夷齊而討燕會吳光進伊尹而誅莽操孔子作春秋師文王而獨獎桓文有是乎然則春秋之義未嘗與桓文明也未嘗與桓文何以稱盟主稱伯討進齊晉種種凡例何由起乎如世儒之說春秋是爲奸雄之走狗耳



尊周二字。齊小白之陰符也。若晉重耳之命周也。如臣僕何尊之有。世儒謂桓文攘楚所以尊周也。夫周之不尊。非獨楚也。十二國諸侯。誰知有周者。而獨以攘楚歸齊晉。是以燕伐燕也。春秋之於楚。生則正其爵。而稱子。死則沒其諡。而不書葬。如是而已。初未嘗擯其爲夷狄。教齊晉攘之也。

尊五霸。頌桓文。此當時世俗之見。仲尼所以難言。而寓志于魯史者也。惟其罪五霸。惡桓文。春



秋所以作也。苟尊五霸而頌桓文，何必春秋哉？五霸何憂不尊？桓文何憂無名？而仲尼更爲此書，潤色褒大之，無謂也。學者明乎此，則春秋之義瞭然，何隱之有？然則尊魯何也？非尊魯也。春秋魯史也。魯史尊魯禮也。魯後周公而諸侯之僭莫如魯。因魯史自尊而尊之直也。以魯之臣脩明魯史，因周公之子孫申明周公之法度，春秋微意不過如此。初無隱微難知者也。俗儒謂無隱不足以貴春秋陋也。



說者謂春秋有隱。後儒不及知。然則近仲尼者其必知之。近仲尼莫如孟子已。孟子云。仲尼之徒無道桓文之事者。又曰。五霸者。三王之罪人。又曰。春秋無義戰。孟子之言春秋。若此。其明且直矣。然則春秋之義其可知。而春秋之于五霸亦可知也。奈何誣仲尼。獎五霸。尊盟會乎。昔夫子謂管仲器小。孟子鄙管仲不爲儒者。謂春秋尊齊桓。則是仲尼之器亦小矣。孟子又何爲而鄙管仲乎。



五霸之亂莫甚於晉楚。春秋所惡莫甚於晉。晉自重耳。以詐力興。其子孫驕恣。惟忌楚之強。始自結于秦。終引吳越爲助。皆爲楚也。世儒貴霸尊晉。詆楚爲夷。而楚實非夷也。謂晉擯楚不與盟。會楚自不會。非晉能擯之也。齊猶託尊王之名。晉則公然自爲也。故春秋之事半晉。而春秋之所惡莫如晉。楚雖僭號。未能得諸侯而晉朝諸侯百有餘年。楚未有加于周。而晉召王徵兵。奔走其卿士。逼殺其大夫。楚未受諸侯之貢。而



諸侯于晉有歲幣有徵發入朝稽顙驅脅叱使莫敢不諾晉之惡什倍于楚故春秋所惡莫如晉

夷夏天地自然之限也西周之亡也以戎故春秋謹之如戎伐周侵齊侵魯侵曹狄滅衛滅邢長狄赤白狄陸渾戎蠻子之類明書於策此正所謂夷狄也至于九州幅員之內西有秦南有楚東有吳越其君皆神明之後其地皆天府神州而世儒一切擯爲夷狄謂不可與同盟會然



則北有燕。盟會不與。亦夷狄也。如是四隅盡翦。棄餘中原一撮土。仲尼何苦自窘。感如此乎。兩君相見。有先王之禮。諸侯不王。而日殺牲塗血。自相盟會。春秋所惡也。與者何榮。不與者何辱。仲尼豈以此分夷夏之貴賤。後儒妄說耳。

禹貢九州之地。皆諸夏也。秦楚吳越居九州地之三。儻盡翦爲夷狄。則天不足九野。地不滿九州。而禹貢爲虛文。春秋爲殘局矣。仲尼何樂爲此乎。世儒旣謂楚爲夷。謂攘楚爲霸。又謂楚與



齊晉并稱五霸。是自背其說也。謂楚僭王陵諸  
姬。無所逃罪。謂爲夷狄。則楚未服也。楚爲夷。則  
江漢襄鄧淮汝徐沛間皆夷矣。秦漢以來。真人  
輩出。大半楚產。仲尼雖不前知。豈其舉東南半  
壁盡割棄之乎。甚無謂也。

吳越當楚東南。去中原稍遠。然而冠裳文字。與  
中國同也。唐虞以來。東南爲文明之區久矣。故  
禹朝諸侯于會稽。舜南狩至蒼梧之野。是自古  
通朝聘也。殷商之季。周泰伯仲雍亡適吳。吳人



樂其德而歸之。是習知有仁賢也。春秋時言游  
爲聖門高弟。吳季札來聘。熟諳先代故典。閱覽  
辯博。賢于子產叔向輩。是素有文獻也。禹貢五  
服。東西南北各五千里。舜葬蒼梧。禹葬會稽。皆  
在五服之內。殷周盛時。無滅虞夏。惟幽厲中衰。  
或數十年不朝天子。而友邦聘問。南北往來如  
故也。儻自洪荒未通中國。若所謂斷髮文身。鳥  
語缺舌。則舜禹何以往。泰伯何以興。吳札豈神  
慧。一朝傾蓋。通敏乃爾。必不然矣。司馬遷作吳



世家謂吳自闔閭始通中國。猶醒者晏起而問夜未央。醉夢之言也。六經以三五爲法。春秋之局。不小于四代。豈其守衰周補苴之天下而設棘籬於堂宇之間乎。又必不然也。世儒耳食遷史之謬附和攘夷之陋說。悲夫。仲尼之志千載而下。無知已也。

孔子生平所欲有爲者。莫如楚。魯定公十二年。罷司寇去魯。至哀公十一年。返在外十有四年。而居陳蔡者強半。陳蔡小國耳。晉楚與吳交爭。



其君臣流離。朝不及夕。孔子奚取焉。蓋二國楚之屬也。其往來頻數。意常在楚也。是時齊將絕晉且分。諸姬惟衛而國小。政亂皆不足以有爲。山東諸國。惟楚地廣民衆。檀弓記有子之言曰。夫子失魯司寇。將之荆。先之以子夏。申之以冉有。其故可知也。及楚昭王使人聘。陳蔡大夫沮之。子貢適楚。昭王以兵來迎。欲封孔子書社地七百里。子西不可。而昭王遂卒。向使昭王不死。孔子其能舍楚乎。世儒謂孔子夷楚。真無稽之



言也

何謂五霸或曰夏昆吾商大彭豷韋周齊桓晉  
文此因孟子言三王罪人牽夏商附會之而孟  
子謂五霸桓文爲盛則是五霸明指桓文同世  
諸侯也或謂齊桓宋襄晉文秦穆楚莊按宋襄  
不振秦穆未與于會蓋掘春秋二百四十二年  
間五強諸侯無王者耳隱公初年周東遷鄭莊  
公始射天子專征伐是霸之始也閔僖之間齊  
繼之晉又繼之成襄以來楚繼之昭定以來吳



越繼之。至哀定間。齊絕。晉分。吳亡。而春秋終。五霸畢矣。故五霸者終始春秋者也。荀卿謂齊桓。晉文。楚莊。吳闔閭。越句踐。爲五霸。近之。

春秋善善惡惡。渾然深厚。而不傷苛刻。是非臧否。較如指掌。而不費勘量。元惡大憝。雖極指摘。而有疑。必從其輕。小過細眚。不事吹求。而陰謀必見其隱。心苟不正。卽震世之功。人所艷慕。不齒。理有可原。卽湮滅之事。人所遺亡。必錄。可否不模稜。而不以筆舌恣訕謗。聞見不詳瑣。而不



以簡約廢法戒立經世之準亦備涉世之方盡  
天理之極亦近人情之至其文質而忠其義簡  
而備其情直而婉其法平而恕不剛不柔不亢  
不屈春秋之義也

人情者聖王之田也故聖人不爲己甚然使王  
者無命討聖人無是非則大亂滋而名教壞矣  
苟屑屑然刻核以爲是非則人將不堪而世愈  
擾故臣弑君子弑父諸侯僭天子大夫僭諸侯  
春秋書之以紀世變防天下而示之嚴也小過



不舉有疑必闕。所以諧人情安天下而示之實也。如世儒之說春秋。吹求洗索。不遺餘力。則申韓之學耳。

春秋之志。在乎康熙皞。萬物得所而不樂聞世有亂事。見世有亂人。故君父之惡。嘯嚚不忍出諸口。弑逆之事。踟躕似不欲言。是聖人之仁也。然而亂臣賊子罪狀暴于簡策。風裁凜乎百世。三綱正五常敘。是春秋之義也。天時地紀。內夏外夷。國賦民稅。水火災祥。有典有則。是其禮也。



五霸陰謀。奸雄隱慝。雖百年往事。如見肺肝。是非明賢。否定危行。言遜而人不以為罪。是其智也。及乎脩辭陳事。標本撮要。一洗史氏粧綴之習。二典三謨。不得與之較忠質。是其信也。其辭韻風旨。溫厚深永。反覆味之。而不窮。左右折之。而皆合。苞孕含毓。可舉千百言約之一字。亦可据一字數縈為千百言。經緯自然。是其文也。上下纔二百餘年。興亡之故。賢否得失之機。禮樂刑政。規模畢具。是其經濟也。言多而是。非不以。



已事陳而可否不預設其法森然其旨淵然六  
通四達不爲城府五霸之功利二十餘國之爭  
戰如蚩飛螳聚謀臣勇士奔競馳逐掀揭震撼  
之氣而以無可無不可之量視之忽如飄風過  
影是其局量也兼斯數者可以觀春秋矣

世儒稱胡安國解春秋每事必求處分若徒書  
其事而已則是附之長大息耳此言非也夫理  
無典要義無適莫賢否治亂道之經也轉移變  
化相時而動治之權也經可豫定權不可以先



設。今言五霸壞王章。諸侯僭天子。經之不正。此可與天下後世明言者也。至于易霸而爲王。反亂而爲治。化篡賊而爲忠孝。攜禮樂征伐而還之天子。此轉移之權。難與天下後世明言之者也。夫子曰。苟有用我。朞月而已可也。三年有成。若問其所以可。所以成。仲尼亦不能預設也。今日設之。明日用之。卽仲尼不能。況世儒設之。使仲尼用之乎。此胡氏所以穿鑿模擬。爲春秋之畫餅耳。夫治亂生于人心。人心不正。則大亂不



止是非不明。故人心不正。春秋者。明是非。反經以正人心而已者也。五霸之震耀于功利也。諸侯大夫之僭侈也。君臣父子之相夷也。禮樂征伐之專擅也。舉世皆醉而不知其非也。聖人直之以告天下後世。使愚夫知其不可。而後權可用也。故曰。君子反經而已。經正則庶民興。庶民興。斯無邪慝。此孟氏之言也。非愚之臆說也。千載而知春秋。孟氏一人而已矣。

春秋有是非。而未嘗是非。所以謂之直道而行。



千古如大路也是故無往不適焉之謂路適一鄉一邑之謂徑一入一塞之謂山蹊天理人情之極自無所取而不當無所折而不中春秋據理正辭以待天下後世人取裁蓋萬裁而萬合左得之而爲左合也公穀得之而爲公穀合也未嘗褒貶而謂之褒貶焉亦合也未嘗名字而謂之名字焉亦合也未嘗命討而謂之命討焉亦合也然直道而行誰毀誰譽見爲褒貶而聖人實無褒貶見爲名字而聖人實未嘗名字見



爲命討而聖人實未嘗命討此其所以爲春秋也非聖人不能作也

凡春秋于攻戰之事第書某國伐某國不詳勝敗何也春秋不義攻戰不問勝不勝也凡盟會第書會某人盟某地不言其故何也春秋不信盟會不問爲何盟也凡大夫見殺第書殺不詳有罪無罪何也春秋重戮大臣不問戮何罪也大抵春秋于時事無樂道之者其詳舊史具矣○春秋稱王以天何也無二天無二王也天王



不稱周何也天下皆周也十二公不稱魯何也  
內魯也凡稱天王不以謚號何也天下皆知有  
王不分爲王某也外諸侯稱國何也各君也稱  
諸侯亦不以謚號何也國知有君不分爲君某  
也卿以下書姓氏名字爵何也各官之義也家  
事不書家臣不列何也天下非一家事也王葬  
必謚諸侯卒必名必爵葬必謚何也各成其終  
也此春秋正名之大畧也

春秋詳畧多因舊史或舊史佚之或舊史載而



聖人諱之非例也。所書大抵皆亂畧或彼善于此參差隨宜亦非例也。如春稱王王稱天書與不書之類皆所謂義也。義者隨宜例者偏主聖人比義不比例也。

或曰春秋無褒貶何以明大義曰春秋所以明大義者其文甚著不在褒貶也。如諸侯不知有周而書春王正月所以明一統也。東周不振而稱王繫之天所以明至尊也。凡弑君父則必書攻伐則必書相盟會則必書殺大臣則必書凡



春秋所書無盛德事以明亂跡也垂戒之義彰彰若斯故曰楚之檇杌魯之春秋一也檇杌天下之至惡也何事于褒貶而後見乎

世儒不知春秋始于視仲尼太高而疑仲尼太深也夫聖人立經垂訓將使愚不肖共曉焉豈其竄端匿跡傲天下後世以所不知乎使天下後世有所不知亦奚貴爲經也世儒謂無隱不足貴春秋不知明白易簡正聖人所貴與天下萬世共見者也司馬遷謂春秋隱諱之文不



可以書見。今其文辭具在。是欲爲隱諱者乎。有不可以書見者乎。是非之心。人皆有之。聖人與人同耳。今不求春秋于人心之是非。而求于諸傳之凡例。舍的然可據之心。不信而謂聖人有不見之隱。亦大惑矣。嗟夫。讀春秋而能盡洗其厯雜之說。千古一快也。

何謂春秋。曰。在魯史。不過錯舉四時以表年耳。在仲尼。則奉天時而無私者也。蓋世變有古今。王霸有升降。人事有得失。聖人有是非。皆天也。



猶日月之有晝夜四時之有寒燠所以爲春秋也

春秋紀年止二百四十二不已狹乎曰東遷以前文武周公之澤在則文武周公之事不敢干也東遷以後文武之迹熄天下無王二百四十二年以爲多矣上不敢逼文武周公是聖人之恭也後之學春秋者自任無前僭也有天子而爲春秋治亂不分昏也僭且昏烏知春秋

南宋諸儒自謂窮理明經而其于春秋實實爾



邵雍作皇極經世以五霸配帝王以易詩書春秋牽強湊合不成義理至謂夫子作春秋推尊晉文此背理傷道不可以爲訓今且列之學官使人人誦法是實生所謂可痛哭者也

嗟夫使春秋淺率無味一覽而盡何以爲聖人之書使深刻隱晦終于不解又何以爲聖人之書其必有至當歸一之論矣觀諸傳紛拏而覺春秋之難罷諸傳虛心觀理而後知春秋之易中道而立能者從之



讀春秋。取傳中事。經所不書者。以質諸所書者。意亦可見。今人徒見其所書。而不見其所不書。則并其所書者。亦蔽于偏見耳。故有非名而不書者。如周殺萇。弘謝晉之類。有沒其功而不書者。如齊人城郊之類。有黜其榮而不書者。如命小白重耳爲侯伯之類。有僭而不書者。如楚不書葬之類。凡宜書而不書。其故皆可知也。

善觀春秋者。見聖人精神心術。不善觀春秋者。見聖人名法科條。夫名法科條。非所以爲經也。



○世儒解春秋但借作施架憑信自己鋪張及其不似曰聊以裨世教云爾春秋自裨世教何勞鋪張及其迂闊難行反以累經是故可憎耳○帝王之治因乎民心春秋不賞而勸不怒而威不動而敬不言而信不顯其刑之教也因心于民藏天下于天下春秋之義也

言之無文行之不遠雖典謨訓誥不廢文也世史敘事代口鋪張都非實錄夫子嘗曰文勝質則史惟春秋之文標旨撮要簡當精切萬世史



學傳信之宗也

談經卷之四終



談經卷之五

京山郝敬學 男洪範輯

門人田必成彭大翮校

禮記凡十三條

禮家言。雜而多端。達者須靈鏡獨照。然後可以觀古人陳蹟。苟無高明豁達之見。耳食訓詁。逐處成滯矣。

是書。漢儒戴聖所記。多先聖格言。七十子門人傳述。非出一手。如中庸。子思作也。緇衣。公



孫志于譔也。月令。呂不韋脩也。王制。漢文帝時  
博士錄也。三年間。荀卿述也。真贗相襲。瑕不掩  
瑜。先儒推周禮儀禮爲經。欲割記爲傳。夫三書  
皆非古之完璧。周禮尤多揣摩。雜以亂世陰謀  
富强之術。儀禮枝葉繁瑣。未甚切日用。惟此書  
多名理。天命人性。易簡之旨。聖賢仁義中正之  
道。往往而在。如大學中庸兩篇。豈周官儀禮所  
有。故三禮當以記爲政。

禮非夫子原定之書矣。後儒各記所聞。致相矛



盾達觀者自能折衷其有不知存而弗論牽強  
附合失之愈遠如王制云公侯國方百里伯七  
十里子男五十里而周禮云公五百里侯四百  
里伯三百里子二百里男百里王制云天子三  
公九卿下至元士百二十人而周禮官職且多  
至三百六十若其人不可勝數也王制云次國  
三卿一命于其君小國三卿皆命于其君而周  
禮云諸侯之卿大夫士皆命自天子月令封諸  
侯以孟夏而祭統云出田邑以秋雜記云公主



九寸。侯伯圭七寸。子男圭五寸。而周禮云。子執穀璧。男執蒲璧。聘記云。諸侯朝天子圭纁皆九寸。三采。諸侯圭纁皆八寸。二采。而周禮大宗伯考工記皆云。天子諸侯圭璧長短各以等差。禮器云。天子堂九尺。而考工記云。堂崇三尺。王制云。諸侯于天子五年一朝。又云。天子與諸侯相見曰朝。而周禮大宗伯云。春曰朝。夏曰宗。秋曰覲。冬曰遇。然儀禮惟有覲禮。無所謂朝。宗。遇。而大行人。又有九服分六歲來朝之說。禮器云。天



子席五重。諸侯席三重。周禮司几筵職云。天子  
席三重。諸侯再重。周禮典命禮儀各視其命數。  
天子大夫四命四牢。而檀弓云。大夫遣車五乘。  
諸侯之卿大夫與天子之卿大夫。命數異。而廟  
制與相見之贊。小斂之衣。几筵之席。諸侯與天  
子卿大夫士。又無別。曲禮王制月令。皆云五祀。  
唯大夫祭。周禮亦云五祀。而祭法云。王立七祀。  
諸侯五祀。大夫三祀。士二祀。庶人一祀。王制天  
子七廟。或云九廟。士二廟。又云士一廟。祭法自



天子至于士。廟外各有壇墠。而王制但有五七等數。無壇墠。王制祭統皆云。夏祭曰禘。郊特牲祭義云。春禘。明堂位云。季夏六月禘。雜記又云。七月禘。然則禘者。常祭耳。而喪服小記大傳皆云。王者禘其祖之所自出。不王不禘。則祭無復有大于禘者矣。祭法。天子泰壇。地于泰坎。周禮。圜丘方澤。樂舞玉帛。天地各異。是祭天與地分也。而詩周頌。昊天有成命。爲祀天地之樂。則是祭天地本合也。祭義云。郊之祭。大報天而主曰。



以月配。是祭日月與天合也。而祭法又云。祭日月星。與四時水旱同。郊用犢。日月用少牢。周禮亦云。禋祀昊天上帝。實柴祭日月星辰。則是祭日月與天又分也。月令仲夏大雩于上帝。是五月也。而春秋傳云。龍見而雩。是四月也。郊特牲云。郊用騂尚赤。而周禮大宗伯以蒼璧祀天。其牲各倣其器之色。是郊牲又用蒼也。祭法天地皆騂犢。而周禮陽祀騂牲。陰祀黝牲。是地牲又用黑。不用騂也。曲禮云。大饗不卜。表記亦云。大



事有時而周禮大宰祀五帝卜日祀大神祇亦如之是又無時也郊特牲云郊用辛而月令云擇元日是又不定于辛也社用甲日而月令仲春擇元日命民社周書召誥社以戊日是又不定于甲也曲禮大夫祭以索牛而儀禮大夫祭則少牢也中庸云上祀先公以天子之禮而周禮司服云祀先公用毳冕則是以侯禮也雜記云士弁而祭于公冠而祭于已而論語云宗廟之事端章甫爲小相章甫冠名是祭于公亦冠



也。玉藻以玄冠爲齋冠。玄端爲天子燕居。諸侯之祭服。而士冠昏與卿大夫聘享。上下通用。玄冠玄端。周禮冕衣裳五等。皆祭服。而曾子問云。冕而親迎。樂記云。魏文侯端冕聽鼓瑟。則是冕亦衣端也。周書顧命。成王康王臨朝。君臣皆冕服。則是冕服不止祭也。禮器云。天子龍袞。諸侯黻。士玄衣纁裳。而周禮云。侯伯鷩冕。子男毳冕。孤希冕。大夫玄冕。士皮弁服。玉藻云。國君帶朱綠。大夫玄華。士緇。故士冠禮三加。帶皆緇。而雜



記又云。諸侯大夫帶皆五采。士二采。祭義云。君用玄冕。夫人用副褱。而周禮又云。王后用副褱。喪大記云。復衣不以衣尸。不以斂。而士喪禮又云。以衣尸。喪大記云。士小斂。陳衣于房。西領北。上大斂。陳衣于序東。西領南上。而士喪禮云。大斂。皆陳衣于房。皆南領西上。周禮云。天子含用玉。而雜記云。用貝。喪大記云。君于大夫疾。三問之。而雜記云。卿大夫疾。君問無算。喪大記云。公之喪。大夫俟練而歸。士卒而歸。雜記云。大夫



次于公館以終喪。士練而歸。奔喪云。大功望門而哭。齊衰望鄉而哭。雜記又云。聞兄弟之喪。大功以上。見喪者之鄉而哭。士喪禮。小斂朔奠。皆陳鼎。遣奠陳五鼎。皆具牲牢。周禮牛人亦云。喪事共奠牛。而雜記有子以遣車視牢。具載饗爲非禮。喪奠脯醢而已。喪大記云。四鄰賓客弔。其君後主人而拜。蓋君爲臣主。君拜則主人拜其後。而曾子問又云。衛靈公弔季桓子之喪。哀公爲主拜。季康子亦拜。孔子謂喪有二孤。季康子



之過則後拜又非也。曾子問云：金革之事無避也者。伯禽有爲爲之。喪大記又云：旣卒哭，弁經帶，金革之事無避也。曾子問云：慈母無服，儀禮又云：慈母如母，服檀弓云：天子之哭諸侯也，爵弁經，緇衣。而周禮又云：天子爲諸侯總衰，檀弓云：祥而縞，是月禫，徙月樂，則是祥之月不作樂。而又云：孔子旣祥，彈琴十日而成笙歌。雜記云：牝用桑，儀禮特牲又云：牝用棘，郊特牲云：鼎俎奇而邊，豆偶，鄉飲酒義云：六十者三豆，八十者



五豆是豆亦奇也。檀弓云。孔子惡野哭者。又云。孔子哭伯高曰。吾哭諸野。曲禮云。卜筮不相襲。而周禮又云。大事先筮後卜。玉藻云。天子日食少牢。月朔大牢。而周禮又云。王日一舉。是日食亦大牢也。射義云。天子歌騶虞。周禮亦然。而儀禮鄉射亦歌騶虞。是士庶人與天子同樂也。周禮司射云。王射六耦。三侯。儀禮大射。諸侯三耦。射三侯。周禮王虎熊豹侯。諸侯熊豹侯。卿大夫麋侯。而鄉射記又云。天子熊侯白質。諸侯麋侯。



赤質。大夫士布侯。畫虎豹鹿豕。如此之類。錯雜紛拏。師說相承。言人人殊。雖使考證詳確。古今異宜。亦難盡用。而鄭康成輩。好信不通。執此徵彼。及其不合。牽強穿鑿。譎張百出。初學爲其所眩惑。隨聲應和。莫知其烏。世儒所以苦于讀禮也。

先儒以大學中庸兩篇爲道學典要。別爲二書。大禮與道非二物也。禮者道之匡郭。道無垠堦。禮有範圍。故德莫大于仁。教莫先于禮。聖教約



禮復禮爲仁。禮儀三百。威儀三千。致中和。天地  
位。萬物育。此道之至極。禮之大全也。故曰卽事  
之治。謂之禮。冠昏喪祭。禮之小數耳。子云。民可  
使由之。不可使知之。世儒見不越凡民執小數  
而遺大體。守糟魄而忘菁華。如曲禮王制內則  
玉藻雜記以爲禮。如大學中庸則以爲道。過爲  
分疏。支離割裂。非先聖所以教人。博文約禮之  
意。自二篇孤行道爲空虛而無實地。自四十七  
篇別列禮爲浮華而無根柢。所宜亟還舊觀者。



也說詳本篇

繁文末節聖人所以教人斯須不去者不專在此故雅言執禮而至其論禮則曰寧儉寧固曰禮云禮云玉帛云乎哉三千三百惟曰約之以禮林放問及本則欣然大之其易簡真切如此若夫論語鄉黨篇所記皆聖人從心不踰之矩周旋自中非古有陳迹依倣爲之也當世人見謂聖人一步一趨皆有格局得之好古以晏平仲之智亦曰孔丘學禮當年不能殫累世不能



究謂問禮于老聃。學禮于邾子。以禮爲格套。聖人習而知之。豈達禮之本者哉。据記所稱。好禮諸賢。莫如曾子。子游子夏。子張。而子夏拘拘。故論交曰。可者與之。不可者拒之。至聞素絢之教。則知禮爲後。故其言曰。大德不踰閑。小德出入可也。子張論士曰。喪思哀。祭思敬。其可已矣。子游論喪曰。致乎哀而止。其論學曰。洒掃應對進退。抑末矣。本之則無。如之何。曾子用功于容貌辭氣。夫子曉以一貫。遂悟忠恕。顏子仰鑽。夫子



博之以文而約之以禮。夫禮至博也。而曰博文。可知博是文耳。禮非約也。而曰約禮。可知約乃是禮。此聖門學禮明法。學者所當默識。

禮以節人情。非遠于人情也。人情樂簡便而趨驕惰。不防檢則淪于禽獸。故不得不以禮節之。若遂強以其所難。而盡易其所安。辛苦勞頓。將并其所謂節者棄之。故聖人制禮。從容和順。使人心安而樂就。如出入之由戶。舍之而不能故。曰先王之道。斯爲美。小大由之。有如此曲禮雜記。



諸篇之煩瑣雖日撻而求人豈從之哉故人皆知放佚驕惰之非禮而不知牽強煩瑣之害禮也

凡禮不可常行者非禮之經用于古不宜于今而猶著之于篇者非聖人立經之意也卽四十九篇中所載如俎豆席地袒衣行禮書名用方策人死三日斂之類古人用之今覺未宜父在爲母期出母無服師喪無服此等雖古而近薄父母爲子斬衰妻與母同服此等甚不倫官士



不得廟事其祖。支子不祭。此等非人情。杖不杖。視尊卑貴賤。哭死爲位于外。熬穀與魚腊置柩旁。此等似迂闊。國君饗賓。夫人出交爵。命婦入公宮養子。國君夫人入臣子家弔喪。此等干嫌疑。祭祀用子弟爲尸。使父兄羅拜。若祫祭。則諸孫濟濟一堂。爲生鬼。此等近戲謔。人死含珠玉。以誨盜。壙中藏甕。甕簋簠等物。歲久腐敗。陷爲坑谷。此等無益有害。古人每事不忘本。酒尚玄冠服用皮。食則祭。至于祖宗姓氏。則隨便改易。



如司徒司空韓氏趙氏惟官惟地數世之後迷其祖姓又何其無重本之思也。廟制天子至士庶有定數皆有堂有寢有室有門。大邑巨家父子世官兄弟同朝將廟不多于民居乎。如云皆設于宗子家則宗子家無地可容。如父爲大夫子爲士庶則廟又當改毀。倏興倏廢。祖考席不暇煖。適子繼體分固當尊。至於抑庶之法一似太偏。喪服有等。不得不殺。至於三殤之辨頗覺太瑣。衰麻有數。不得不異。至於麻葛之易亦覺



太煩。天子選士觀德。用射。射中得爲諸侯。如此之類。雖古禮乎。烏可用也。故凡禮非一世一端可盡。古帝王不相沿襲。聖人言禮不及器數。惟曰義以爲質。良有以矣。此四十九篇大都先賢流傳。後儒補緝。非盡先聖之舊。而鄭康成信以爲仲尼手澤。遇文義難通處。則稱竹簡爛脫。而顛倒其序。根據無實。則推殷夏異世。而逃遁其說。節目不合。則游移于大夫士庶之間。而左右兩可。解釋不得。則託爲殊方語音。而變換其文。



牽強穿鑿殊乖本初。蓋鄭既以記爲經。不敢矯  
記之非。世儒又以鄭爲知禮。不敢議鄭之失。千  
餘年來。所以卒瞽瞍然耳。昔者老聃爲周藏史。  
夫子果從之問禮乎。則知禮莫如老聃。而其言  
禮。則曰忠信之薄。何自毀其學乎。佛子罵佛。自  
是一重公案。故夫子曰。老子猶龍。世儒以老氏  
言忽之。至鄭康成銖銖兩兩。則曰知禮。此夫子  
所謂飛者。吾知其爲鳥耳。

禮不根情。則枯槁而無生意。故聖人言禮。不貴



文而貴情。行禮不貴禮而貴義。如親喪不飲酒。食肉禮也。飲酒不樂。食肉不甘。情也。先王因人有是心。制是禮。而世人本是心。行是禮。心安理順。則中節而和。斯謂之禮矣。今之行禮者。但言不飲酒。不食肉之文。而更不問不飲酒。不食肉之心。雖貪饕餮之夫。能忍而不飲。不食。卽謂之知禮。其毀行敗節者。能三日水漿不入口。皆稱曾參。嗟夫。是烏得爲禮乎。

世儒謂禮經未全亡。而樂經亡矣。此市兒語也。



夫禮樂非二物也。禮樂偕亡。天下後世何緣復得見禮樂哉。今之禮樂。由古之禮樂。非自天降。非從地出也。皆聖人之教也。故曰。禮云。禮云。玉帛云乎哉。樂云。樂云。鐘鼓云乎哉。世儒惟以禮樂爲玉帛鐘鼓。求其數而不詳。故云。禮樂亡。至欲引儀禮周禮爲經。屈記爲傳。夫記爲傳。猶可。而周禮儀禮。可以爲經乎。萬世常行之謂經。二禮之不行於天下後世。今十且九矣。二禮詳于器。而記詳于義。義可兼器。器不可兼義。如以義



耳。寧獨記乎。雖易詩書春秋。何經無禮樂。四十  
九篇。大經小曲。何器之不備乎。器者。隨時變通。  
而義者。百世不易。故夫子言禮曰。殷因於夏。周  
因於殷。所損益可知。其言樂曰。始作翕如。從之  
純如。皦如。繹如。以成樂。其可知。必如周禮官職  
儀禮節文。而後爲禮樂。則聖人宜取鐘鼓管籥。  
綸絲比竹。各定爲一法。編爲一書。又取儀禮所  
不具者。如天子諸侯大夫士。升降坐立。拜起服  
食器用。各定爲一法。編爲一書。然後謂之經。然



後謂之禮樂存。如此則豈惟時勢古今蹊戾難行。且文多於牛毛。繭絲。冗瑣煩複。六經有此體裁否。故自達人觀之。三禮已詳矣。而猶謂之禮殘樂亡。愚故曰市兒語也。

禮者物之則。詩云。有物有則。物之類萬。而物各備萬。何止千百。故曰三千三百。甚言多耳。非謂先王定三千三百爲數。而限人以必由也。鄭康成解禮。求合此數。以周官三百六十爲經禮。以儀禮十七篇爲曲禮。其不足三千者。謂之逸禮。



所謂癡人前不得說夢也。

鄭康成解禮多穿鑿。而俗士詫爲辯博。小有異同。則云學問未到。康成地焉敢高聲議漢儒。夫議論前人長短。非也。議論道理經術。何傷道理經術。非前人之私物也。今據四十九篇中解說。謬者如曲禮云葱。漆處末。漆與漑同。通作泄。易井卦九三云井渫不食。古借作屑。內則云屑薑。與桂。士喪禮云甕三醯醢屑。是也。鄭云漆。蒸葱也。又國中以策芻卹。勿驅。本謂車行城中。垂策。



緩步以策末拊卹其馬勿縱疾驅鄭以勿字屬上讀解云卹勿搔摩也檀弓云公儀仲子之喪檀弓免焉凡免冠而加布于首曰免與纓同自五服以至朋友新喪者纓禮也而鄭解云檀弓故爲非禮以諷仲子之廢適凡免冠之免讀如字加布焉曰纓通作冕與免同而義異故喪服小記曰爲母免而以布然則爲父免而不以布免冠而已以布則加纓也鄭于凡免皆混作纓解又宋敗魯師于乘丘公御縣賁父死死御



一人耳。鄭謂與車右同死而誤以卜國之卜爲人姓。又謂申詳爲子張之子而無所據。云顓孫申詳周秦聲相近也。又曾子弔於負夏主人旣祖塋池反柩本謂塋起柩前柳池使見棺行禮也。鄭變塋池作徹奠。又魯哀公誄孔子曰嗚呼哀哉尼父魯地有尼丘故孔子以尼字丘蓋呼其字哭也。鄭謂以尼謚之又未仕者不敢稅人稅作稅與襚同贈死衣服曰襚未仕則衣服不備故不敢襚人鄭謂以物遺人也。又國君七个



遣車七乘。大夫五个。遣車五乘。古个字與介通。禮器云。諸侯七介七牢。大夫五介五牢。周禮諸侯貳車七乘。介七人。故雜記云。遣車視牢具。謂送葬之車。視死者命數爲多寡。而鄭以介爲遣奠。包牲體之數。以遣車爲塗車。納之壙中者也。又國昭子謂子張曰。噫。母曰我喪也。斯沾爾專之母。戒辭沾爾自用貌。言勿謂我之喪。我沾沾然自專主也。鄭讀噫母爲句。我喪也。斯沾爲句。謂沾當作覘。又歌斯猶猶合也。凡歌必有節。以



合之。如今人唱曲則拍板拊手之類。鄭謂猶作  
搖。又季康子母死。公輸若方小。斂般請以機封。  
般。公輸若名。稱般者。自請之辭。若方與小斂。因  
自請他日葬。已爲機。以寸。不用碑。繹也。鄭以公  
輸若般爲兩人。以方爲句。謂若爲匠師。年幼。  
般爲若族人掌窆事也。又諸侯輜而設幃。爲榆  
沈。故設撥。爲讀去聲。榆木名。凡物重曰沈。撥與  
紼通。謂諸侯以榆爲柩車。榆木沈重難行。風俗  
通曰。桑車榆轂。聞聲數里。故設紼以引之。鄭云。



以水澆榆白皮汁播地引車也。又高柴葬妻。犯  
人禾。申詳請庚不許。曰後難繼。此正識治體者。  
而鄭謂爲恃寵虐民。又晉獻文子成室。晉大夫  
發焉。獻文趙武謚也。發猶落也。始新之名。鄭云  
獻賀也。發發禮往也。王制冬祀行。行亦謂之井。  
孟子云井上有李。謂道上有李樹也。古者井地  
井間爲道。道間有水。所謂行潦也。冬水用事。故  
祭行。卽是祭井。鄭謂冬陰盛寒於水。祀之于行。  
從辟除之類。則是以行爲土也。禮運云。黃桴而



土鼓。蕢與塊通。合泥草爲鼓。推也。土曰塊。草曰蕢。論語曰。譬如爲山。未成一簣。簣。蕢。蕢同。卽塊也。荷蕢過孔氏之門。農家荷土坏者也。喪禮寢苦枕塊。草土同類。故孟子曰。不知其足而爲屨。我知其不爲蕢。古蕢塊同。而鄭云蕢讀爲塊。聲之誤也。又禮器如竹箭之有筠。筠。竹節也。竹節均。故曰筠。言人外有禮以爲之節也。鄭于尚書顧命。敷重筍席。註云。筍。析竹青皮。引禮記如竹箭之有筠。是以筠爲青皮。以箭爲筍也。又天子諸



侯廢禁。大夫士斚禁。承酒尊之器。曰禁。無足曰  
廢。士喪禮浴尸設廢敦。亦謂無足之敦也。士虞  
禮有廢爵。有足爵。論語曰。中道而廢。亦無足之  
義也。斚。輿通形似車箱。有足。故高。廢禁無足。故  
卑。所謂以下爲貴也。而鄭謂廢禁爲不用禁。斚  
禁爲無足也。又犧尊。本謂尊上畫犧牛之形。鄭  
云犧作娑。畫鳳羽於尊上。娑娑然也。又周坐尸。  
詔侑武方。本謂周禮爲尸者坐。而祝與佐食詔  
告勸侑。其步武進退皆有方法。而鄭解武作無。



又禮器云罍尊在阼。犧象在西。君在阼。夫人在房。按廟制有東房無西房。故祭統亦云。君純冕立于阼。夫人副褕立于東房。尊在房戶之外。犧二尊并列。罍東犧西。以西爲上。神席在室西。故也。鄭謂人君尊東。天子諸侯有左右房。謂夫人在西房也。郊特牲。鄉人禘。本謂鄉人大儺。袒裼相逐。而鄭解禘作裼。強鬼也。又縮酌用茅明酌也。醲酒澆于清汁。獻澆于醲酒。猶明清與醲酒于舊澤之酒。本謂用茅泝醴。盛于醲和之以



水加鬱汁以獻如今人以水和陳酒飲之類鄭  
援周禮謂明酌爲事酒醖酒爲盎齊清爲清酒  
汁獻作汁莎舊澤本謂舊酒醖厚如膏澤也鄭  
變澤作醖內則云男子入內不嘯感口出聲曰  
嘯凡隱事相呼則嘯故盜黨嘯聚鄭變嘯作叱  
又內則世子生告於君接以大牢本謂世子見  
君君具大牢饗諸臣而鄭變接作捷謂食其母  
補虛強氣也又男鞶革女鞶絲鞶大帶也鄭謂  
鞶爲小囊未聞古男子皆佩皮囊也又年不順



成君摺本。古者執竹簡記事。曰笏。笏本竹也。後世易以玉象。故謂竹笏爲本。鄭以笏下爲本也。玉藻曰。諸侯笏荼荼。荼。和柔之意。謂諸侯之笏。上刻而挫其角。如荼然。與天子挺直異。鄭因古荼字。有邇作舒者。遂變荼爲舒。以附會考工記。玉人大圭。杼上之杼。云天子之笏。舒上爲椎頭。諸侯舒上無椎頭也。又侍坐必退席引而去。君之黨。黨猶側也。謂不敢迫近君側。猶鄉射禮云。乏居。侯黨之黨。而鄭謂黨爲鄉之細者。避



君親黨也。又侍食。君未覆手。不敢殽食。殽。放箸。曰覆手。古人飯以手。食必仰其手。食終則覆手。鄭謂以手循口旁餘食也。又親沒不髦。謂五十者始衰。遇親喪不髦頭也。鄭云去爲子之飾。又大帛不綌。古冠小而撮髮。以緇布爲之。周始爲委貌大冠。以玄帛爲之。故曰大帛。衛文公大布之衣。大帛之冠是也。鄭據雜記大白冠。謂以白布爲冠。又裘之裼也。見美服之襲也。充美皮上用單帛爲表。曰裼。裘外加重衣。曰襲。鄭云裘之



外有裼衣。裼衣外有襲衣。又尸襲本謂始死之尸。重衣斂襲。鄭以爲祭祀之尸尊襲衣充美也。又笏畢用也。畢卽簡。君前用笏當簡記事。鄭作盡訓。笏本竹簡。鄭作珪訓。喪服小記云。士祔于大夫。則易牲。本謂孫爲士者。祔于祖爲大夫者。之廟則祖用少牢。而孫用特牲。廟可祔而牲不可襲。故曰易牲。鄭云不以卑牲祭尊。則是並用少牢也。大傳云。同姓百世昏姻不通者。周道然也。周道猶言大道。鄭解爲周禮。然則夏商禮有



同姓爲昏者與少儀云不貳問謂人隱而不答則不可再問鄭謂問卜不可貳其心也又車不雕幾幾細微也雕刻爲細文鄭解幾爲圻鄂又枕几穎杖刀卻刃授穎櫛謂之穎鄭以穎杖之穎爲警枕授穎之穎爲刀環樂記云敦和率神便宜居鬼本謂樂從陽禮從陰鄭謂聖人死爲神賢人死爲鬼學記云足以謏聞謏誅誘也使僂通獵名也鄭作小又赴辭使某實實信也使謂之信鄭作至雜記復夫人以狄衣素沙沙紗



通薄縗也。婦人盛服。外籠素紗單衣。詩云。其之  
展也。蒙彼縗絺。又云。衣錦褰衣。士昏禮加景。是  
也。鄭謂六服以素紗爲裏。又大夫不掄絞。絞縗  
通單縗也。鄭謂絞爲青黃色。又士練而歸。士次  
于公館。大夫居廬。士居堊室。本謂哀次輕重先  
後。鄭以堊室之士爲邑宰。公館之士爲朝士。又  
大夫卜筮宅。葬曰。公私皆有司。占者史而服  
異。又卒哭諱。王父母兄弟世叔。父姑姊妹子與  
父同諱。二條鄭皆不達。而曲爲之說。詳經解。又



小斂環絰。公大夫士一。本謂弔者視小斂之服。卽所謂玄冠者。易之而已也。鄭以環絰爲孝子。喪大記云。未小斂。主人出徒跣扱衽不冠曰徒。不屨曰跣。凡罪人髡髮則免冠。周禮司圜職云。害人者弗使冠飾。而加明刑任之以事。而收教之。故不冠謂之徒。卽所謂笄纆也。鄭謂親始死素冠。是未識徒爲不冠也。又主人袒脫髦。髦與毛通。亂髮蓬首。如今人脫去網巾。鄭以髦爲人子事親之飾。又子大夫公子衆士食粥納財朝。



一溢米莫一溢米納進食也。財與纔通猶僅也。溢與搯通一手所握曰搯言朝夕僅進米一搯耳。鄭訓財穀也二十兩曰搯又給無統統組屬所以束也給單被也大斂外已有絞故給不復用組鄭解爲被上之識又祥而外無哭者禫而內無哭者其間哀止卽間傳所謂中月而禫鄭云大祥門外不哭禫則門內不哭也祭法云相近于坎壇本謂四時寒暑日月星水旱六宗之祭與天之泰壇地之泰坎相近鄭解相近二字



作禳祈表記云。裼襲不相因。凡去衣曰袒。單衣曰裼。重衣曰襲。裼襲不止衣服。凡執龜玉重器。皆有裼襲。單藉爲裼。重褰爲襲。鄭謂執王者衣。裘時裼。時襲也。又唯卜之日稱二君。謂人臣筮仕則稱兩君。擇其所事。非是則君不稱二。鄭引春秋傳。晉惠公卜貳圉之語。謂辭得稱君之貳也。中庸云。見乎蓍龜。動乎四體。謂禍福先兆有見于卜筮者。與形于人身動作者。鄭解爲龜之四體。春占前左。夏占後左。秋占前右。冬占後右。



也服問云從無服而有服公子之妻爲公子之  
外兄弟本謂妻爲其昆弟之爲父後者期鄭謂  
外兄弟爲公子之外祖父母從母也大學云之  
其所親愛而辟辟與僻同本謂用情偏僻鄭解  
辟作譬又見賢而不能舉舉而不能先命也本  
謂天命鄭解命作慢鄉飲酒義云聖人制之以  
道鄉人士君子本謂聖人制此禮以教鄉之衆  
人與士君子鄭以鄉人士君子連下文尊于房  
戶之間爲句以鄉人爲鄉大夫士爲州長黨正



君子爲鄉大夫士也。聘義云。乎尹旁達乎。信也。尹割也。旁達者。一王割而爲圭。爲璋。瑕瑜旁分。皆不失信也。鄭解乎尹作浮筠。玉色也。喪服四制云。高宗諒闇。諒明也。闇暗也。猶言昧爽幽居。愁處不分明之貌。鄭謂諒作梁。闇作庵。爲倚廬。他如此類。不可枚舉。必若世儒謂學問不及鄭。則一切朦朧。不敢聲說。承迷習醉。何時而已。甚者解說不通。輒以意變亂舊章。如王藻笏度樂記師乙雜記內子以鞠衣。喪大記君設大盤等。



章本無錯簡自生顛倒又如燕義首節實錯簡而不知其餘文字如從容之作春容汁獻之作汁莎封作窆純作緇大圭不琢作不篆監諸利作艷諸利諸侯荼作諸侯舒其慎也作其引也祭義見間以俠鯁合見間二字作覲曾子問告用牲幣作告用利幣曲禮日而行事則必踐之作必善之樂記禮有報而樂有反作禮有褒喪入記加僞荒作帷荒中庸一戎衣有天下作一戎服若斯之類未可一二今皆從舊以俟後之



君子參焉

冠裳服色等制詩書無明據。今世所傳用皆唐成之說也。愚按冕最貴。弁次之。冠通用。上古冠制最小。僅取撮髮。卽今羽流所戴。是其遺象。詩云。臺笠緇撮。緇緇冠撮。小貌。字從元。首也。從寸。小也。從冂。象形也。弁制大覆額。詩云。有頍者弁。頍。覆額貌。弁。盤也。盤。大也。字從升。兩手拱俸以戴也。用玄帛爲之曰爵弁。用皮曰皮弁。皮無飾者曰韋弁。冕則加板于弁上。前後垂旒。其制又



大于弁。其形稍俛而前。故曰冕冠。弁冕皆用玄。帛冠有緇布者。冕有用麻者。古制也。凡禮服衣裳殊。常服則衣裳連如深衣。袞衣袍之屬皆連也。凡服色多用玄。緇纁纁卽赤。周以火德主尚赤。玄緇二色皆自赤出。故冠服多用之。卽袞衣亦以玄爲地。而加刺繡耳。裳多赤色。或玄黃。或雜不等。黻蔽膝也。鄭謂黻色與裳相稱。而易與詩多言朱芾赤芾。則是裳不離赤。然裳色不等。而蔽每稱赤。則是黻色亦不盡從裳也。鄭謂朝



服玄衣素裳皮弁服純素弁用白皮天子視朝諸侯視朔皆用之羣臣亦然夫平居無事舉朝衣白未見其可卽殷人尚白非必吉服純用白也漢武帝始製白恰傳玄以爲軍容非國容于寶以爲縞素凶喪之象古今非頓異也端者禮服之通名凡禮服制方故謂之端用玄爲玄端用素爲素端雜記云端衰無等則是衰亦可謂之端非端定爲一衣也裼襲之名不專指衣單曰裼重曰襲凡手執寶器重幣亦稱裼襲呈現



其物而單藉之。謂之裼。不見其物而重裹之。謂之襲。非但衣服有裼襲耳。鄭謂裘上有裼衣。裼衣上又有襲衣。謬也。詳見各章。冕衣裳九章。引虞書山龍華蟲等爲証。尤爲牽強。詳見周禮司服。世儒耳食康成。以爲知禮。不復考索。轉相傳習。凡今之禮。皆鄭康成之禮也。

鬼神者。造化之靈。人物之命。大而天地山川。小而昆蟲草木。凡有生氣。不離鬼神。人者鬼神之會。先王制爲祭祀。使人知有鬼神。又制爲卜筮。



使人知有鬼神之靈。所以顯造化之情狀。齊億兆人之心志也。洪荒之初。混沌未鑿。二氣苞孕。人物初生。鬼神道隆。叔季元始。剖散如日。既中幽暖。全消陽驕。陰微鬼道日遠。人事日益。是以殷人尚鬼。而周人尚文。世運自然也。孔子贊易作十翼。不言卜筮。而言義理。以開物成務。立人之道爲本。故曰。務民之義。敬鬼神而遠之。神怪不語。非其鬼。則不祭。是以臧孫居蔡。譏其不智。此孔門民義之教也。至于定禮。豈自背其說耶。



而鄭康成解禮專引讖緯附合。如以五帝爲人各有名號姓字。句芒祝融等神皆以人充數。其說怪誕非聖人務民義之教。蓋天之有帝以人事天其道不得不爾。如鳥能祭則必以鳥獸能祭則必以獸。各因其所固然爲報本反始。非天果有帝如人也。猶曰稱宮星稱垣亦因人立名耳。豈曰真有宮星真有垣耶。老氏曰可名非常名通乎此者。與之譚鬼神祭祀可矣。

說經卷之五終